

A P O L O G I A

Matthie Flacii Illyrici vnd
Nicolai Galli.

Das die Adiaphoristen/vnd nit sie/ tren-
nung in vnsern Kirchen der Augspurgischen Con-
fession / vnd vneinigkeit angericht/ Vnd noch
bis daher hindern/das es zu keiner Christ-
lichen einigkeit gebracht wird/auch
wie dieselbig einigkeit zutreffen sei.



1. Reg. 18.

Ahab sprach zu Elia/ Bistu der Israel verwirret?
Er aber sprach / Ich verwirre Israel nit / Sondern du vnd
deines vatters haus / Damit das π des HERRN gebot verlassen
habe / vnd wandle Baalim nach.

Summa dieser schrifft.

D^{1.}ie Adiaphoristen sind Anfanger der verenderung in vnsern Kirchen gewesen.

Derhalben auch der trennung vnd zwispalt Vrsacher. Den wir vns nit von ihnen / sondern sie haben sich von vns getrennt / in lere vnd in Ceremonien / damit Israel sündigen gemacht / wie Jeroboam / das ihnen notwendig hat müssen widerprochen werden / vmb Gottes vnd der Kirchen willen.

^{2.}Wie Gott on ware Christliche Buß ihnen auff solches sünde nit kan versönet werden / also kan auch die Kirch ihne nit recht versönet werden / on fruchte derselben Buß / sie thun sie gern oder vngern / Dadurch sie auffhören müssen / zu versönnung der Kirch / die verfürte in derselben sünde auffzuhalten / od sie an der Buß zuhindern / auch andere weiter darein zusflechten / vnd vrsach zugeben / damit reine lere auff die nachkommen gang möge verfelscht werden.

^{3.}Lassen sie sich aber beduncken / das sie dermassen nit gesündigt / vnd derhalben solcher Buß nit bedürffen / So wollen wir sie es durch ein vnparteysch ordentlich Kirchengericht vberzeugen / oder sie vberzeugen vns / das wir ihnen vnbillich widerprochen / vnd damit der trennung vñ zwispalt Vrsacher worden sind.

Dürffen demnach vns nit on vorgehend ordentlich erkennen solches gericht / mit heimlichen bösen praestiben suchen zuvertrucken.



NICOLAVS GALLVS.

In diesen streit der Adia-
phora gekommen / vnd wie sawe mirs
anferglichen worden / hab ich an einem
andern ort / nemlich in der Vorrede
auff mein Disputation von Adiaphoris / Lateinisch
vnd Deutsch vorlengs ausgegangen / warhafftig an-
gezeigt / hie vnnötig widerumb zuerzelen. Vnd be-
zeuge noch für Gott / das es also war ist / vnd ich
aus keiner andern ursach mich damit hab eingelass-
sen / denn das ich gesehen / wie etliche vnser
Obersten vnd Gelehrten mit ihrem neuen Inter-
rim zu Leipzig / den feinden des Euangelij zugefal-
len / aus menschlicher fürcht vnd weißheit (das ich
hie nit weiter sage) ein rechtes warcs Jeroboams
kalb / in vnsern kirchen der Christlichen Augspur-
gischen Confession anrichteten / vnd sich nit wolten
dauon abweisen lassen / sondern jederman zwingen
dasselbig anzuberē. Do hab ich mich als ein Christ /
dazu ein Diener der kirchen in offentlichem
ampt / für Gott vnd der kirchen in meinem gewis-
sen schuldig erkent / alles ander vnangesehen / da-
wider zureden vnd zuschreiben / was ich gekont.

Das nu daraus ein grosser zant / spaltung vnd
zwitracht in vnsern kirchen / vnd wider die für-
A ii nemste

neimste vnserer leter zum teil worden / vnd noch nit
auffhöret / mit grossen sünden / ergernis / vnd scha-
den der Kirchen / Vnd solches vns wil zugemessen /
auch mit geschwinden practiken in die Haupterge-
bildet werde / als sein wir dessen allen die Vrsacher /
da ist vns warlich vnser antwort vonnöten / damit
sie öffentlich fürkome / es gerate wohin der liebe
Gott wölle.

Vnd wil ich erstlich darzu hie auffo klerlichst
anzeigen vnd beweisen / das nit wir / sondern sie /
die Adiaphoristen selb sampt den ihren / alles dieses
zanks / trennung / zwispalt / sünden / ergernis
vñ nachteils in vnsern Kirchen die waren Vrsacher
sind / Vnd noch hindern / das es zu keiner waren
Chrißtlichen einigkeit widerkümpt.

Darnach wil ich auch wider gedencken der
gebürlichen / vnabschlegigen mittel zu solcher
einigkeit / Wo nit mit falsch / oder lauterem
gewalt sol gehandelt werden / oder man den han-
del auch nit on sünde / schande vnd schaden in der
ganzen kirche / wil also stecken lassen / Daran denn
alle die jenigen / die solches durch nachuolgende
Chrißtliche mittel vnd wege verhüten könten vnd
soltten / für Gott werden die schuld tragen müssen.

So ist erstlich vnlangbar / meniglich offenbar
vnd bekentlich bei den Adiaphoristen selbs / das ja
nit

nit wir / sondern sie enderung in vnsern kirchen/
bede in lere vnd in Cereimonien angefangen / was
nit angericht / doch bewilligt haben / vnd wir da-
mit vns nit von ihnen / sondern sie sich von vns
abgesondert vnd getrent / Wie des das Leipzigsch
Interim mit seinen Actis / vorgehenden vnd nach-
volgenden / gedruckten vnd vngedruckten / zu gu-
tem teil verhanden / so sie nit leugnen können. Es
hab sie gemacht auch wer da wölle / welchs vns
dieses fals gleich gild / so sind sie die gewesen / welche
es doch beschützt vnd verteidigt haben / vnd sind
mit vns drüber so hart zu vnfrieden worden.

Dargegen ja weder sie noch jemand anders vns
einiger enderung oder newerung / weder in lere
noch in Cereimonien dem widerteil zugefallen / mit
ichte zeihen mügen / habens vns auch bis daher nit
zihen. Denn ihnen selb / vnd jederman bewußt
(wie das werck solchs auch selb redet) das vnser
thun / reden vnd schreiben nit anders gepesen / noch
weiter gangen / denn das wir bey dem betten blei-
ben mögen / was wir vnd sie selb vnter Luthero in
vnser n Kirchen gehabt / vñ für gewisse warheit vñ
recht erkant haben.

Wie komen wir denn nu darzu / das wir die Ur-
sacher dieser trennung vnd zwispalt sein sollen /
nemlich / wie dz arme Schäflein / das dem Wölffe
mußte das wasser betrübt haben?

Haben sich zwar die Papisten solcher vnser zwispalt auch nit fast zuſchewen/ weil dieſelbig/ wie mit Paulo gegen dem Apoſtel Petro Gal. 2. allein dahin gehet/ dz man ihnen aus fürcht/ derſelben zeit/ nur gar zuviel hat eingerechnet vnd geheuchelt. Vnd ſcheinet/ meine ich/ hieraus nur gar gnugsam/ wer in ſumma die Verſacher dieſer trennung vnd zwispalt ſind.

Ja ſprechen ſie aber/ Ir ſoltet darzu haben das maul gehalten / wie viel andere gethan / oder es doch auff andere freundlicher wege geſucht / ſo were kein trennung oder lermen worden.

Das iſt eben geredt/ wie die Papisten vne ſamptlich zu beiden teilen ſchuld geben/ Wir ſölten des Euangelions ſchweigen / vnd ſie mit ihrem thun ſmer laſſen fort machen/ ſo were kein ſpaltung noch vnfried deſhalb auch zwifchen vns vnd ihnen. Wie wenn Sathan zu Chriſto ſpreche: Er ſolte ihn laſſen fort machen/ vnd in ſeinem thun nit hindern/ oder würde ein lermen draus / ſo ſolte Chriſtus jm die ſchuld haben? Auff welche weiſe denn der gottlos Ahab/ die ſchuld wil auff Eliam ſchieben/ das er ſey der Iſrael verwirre.

ſprechen ſie darauff ferner/ Wir ſind nit Chriſtus/ noch Elias/ noch Apoſteln/ noch Päbſte ob Biſchoue/

Bischove/nach sünsten grosse hohe leute / darumb
vns nit solte geziemet habē dawid zuredē/ So sind
wir aber einfeltige Christē/vñ ich/wie oben gehört/
bin gewesen vnd noch / ein offentlicher einfeltiger
Prediger Christi/bezwungen vnd getrieben in mei-
nem gewissen durch den gemeinen Göttlichen be-
fehl/ an alle Christen vnd Prediger im ersten vnd
andern gebot / Gottes warheit vnd ehre / auch
durch dz gebot der liebe/des negsten seele zuerrettē/
das ich nit hab schweigen sollen / gegen den Adia-
phoristen so wenig/ob gleich nit in meiner Kirchen/
als gegen Papisten/Interimisten/Widerteuffern/
Zwinglern / oder dergleichen Secten / Ja/ vmb
soniel weniger gegen den Adiaphoristen / als viel
mehr schaden von ihnen/denn von andern in vn-
sern Kirchen zubeforgen.

Das andere viel zum teil geschwiegen haben/vnd
noch schweigen/ lasse ich ein jeden izt in seinem ge-
wissen/vñ zu seiner zeit gegen Gott verantworten.

So sind sie/die Adiaphoristen/von vns vnd von
andern / mündlich vnd schriftlich / in aller güte
vnd ehrerbietung vorher offft gnug ermanet / aber
nur allein zornig worden/oder wenig zur sache ge-
antwortet/ vnd nichts destter weniger fort gefaren/
Das sie sich des Proceß billich auch nit zubelagen.

Das die sachen aber nit so klein / wie mans von
kleinern wil / Es sey vmb ein Chorrock / Ceremo-
nien oder Nittelding zuthun gewesen / Sonder
das vmb die ganze lere des heiligen Euangelij/
Gottes ehre vñ heil der Kirchen zuthun gewesen/
beweisen vnser wolgegründte / klare / vnuerlegte/
vielseltigeschrißten / daran sie sich noch versuchen
mögen / dieselben mit grund Götliches wort zu-
uerlegen / so sie können.

Nein der Artikel vnser rechtfertigung / desgleich-
en von der Buß vnd Sacramenten / welche zum teil
gestimmelt / zum teil verfelscht gewesen / sind nit
für kleine / oder für Adiaphora zurechnen.

Vnd ist in den Adiaphoris oder freien dingen/
wie sie an ihn selbs sein mögen / derselben zeit vñ
gelegenheit / do sie vmb des Interims willen auffge-
drungen worden / manigseltige sünde nach ihier
selb eigen lere / Adiaphora in casu confessionis, ne-
cessitatis, scandali, cum opinione cultus & meriti fieri
moralia / das ist / Wenn ein ding das an ihm selbs
frey ist / mit dahin gereicht / das es wider des glau-
bens bekentnis sein wil / oder wil daraus ein gebot
werden / zu ergernis geraten / oder auch zum ver-
dienst vnd Gotteadienst gezogen werden / wie
mit allen ihren Adiaphoris geschehen / soniel die-
nigen belanget / welche sie vnsern kirchen anfanglich
haben

haben auffgedungen / So werden lauter sündes-
ja verleugung des glaubens / vnd lauter abgöttereien
draus. Daher denn gehören die sprüche Christi /
Niemand kan zweien Herren dienen / entweder er
wird einen hassen vnd den andern lieben / oder ei-
nem anhangen vnd den andern verachten / Item
Wer nit mit mir ist / der ist wider mich / Ob nit in
seinem sinne / oder nach seiner meinung / so ist es aber
nach der meinung Gottes vnd Christi / wie die
wortlauten / Vñ wie Paulus spricht Christus vnd
Belial haben gar kein gemeinschaft miteinander,

So hats auch mit etlichen / sonderlich den Ober-
lendischen Kirchen die erfahrung geben / das solche
tatschlege vnd sickerwerck mit etlich wenigen klei-
nen enderungen / bald das ganze Interim / endlich
das ganze Bapstum bracht haben / also das sie
desselben noch nit wider ledig / wie an Ulm / Nörd-
lingen vnd dergleichen enden mherzusehen.

Vnd was hetten wir schönes / wenn es nur bei
dem blieben were / das sie haben wolten / als bey
ihrem Leipziger Interim / nemlich / des sie nur
selbs gerewen / vnd sie sich sein scheinen müßten?
Da sie anfänglich auch selb vber geklagt vnd sich
sein als einer schweren dienstbarkeit beschwert ha-
ben? Da doch auch in wenig jaren das vollige
Bapstum hetten müssen aus volgen / Als nur allein

aus der Bischoue Iurisdiction vnd Ordination der
Kirchendiener / Wenn die Bischoue die gehabt/
vnd niemand mher ordinirt hetten / denn der ihnen
dazu gefallen / wie bald hetten sie nur dardurch
alles wider in ihre hende gebracht / ob sie gleich mit
den alten gegenwertigen Dienern ein zeitlang her-
ten durch die finger gesehen?

Mus derhalben ein jeder / vnd sie selb bekennen/
wie in einem öffentlichen schreiben in einer grossen
versamlung vnlangs fürbracht worden / Wenn es
an vnser etlicher widersprechen oder schreien gewe-
sen were / sie wolten dem Interim wol bessern ge-
horsam geleistet haben / aber für vns hab man da-
zu nit mögen komen / Wolten also gern auch die
Potentaten auff vns hetzen / als auff die einigen Ur-
sacher alles vngehorsams gegen dem Interim,

Haben ihnen gleich also ein zwickmülen erdacht/
vns zuverdrücken / Gegen den Potentaten der wi-
derwertigen Päpstischen Religion / das sie des vn-
gehorsams vnschuldig / die schuld nur auff vns
schieben wöllen / warumb bede dem Interim nit
besser folge geschehen / vnd noch nit wol vergleich-
ung mit ihnen in der Religion fürzunehmen (weil wir
also geduldet werden) darzu sie nit vngeneigt bey
denselben Heuptern haben wöllen angesehen sein.
Gegen

Gegen Fürsten vnd Stenden vnser Christlichen Religion der Augspurgischen Confession / als verhezen wir auch die leut gegen ihnen zum vngehorsam in der Religion / vnd wie nu oft gehört / sein die Vrsacher aller trennung vnd zwispalt jertz in vnsern Kirchen.

Dabei mans noch nit bleiben laß / sonder beschwert vns noch ferner mit losen argwönigem erdachten vngrund / doch zu vnser verdrukung wol dienslich / Als mir geschicht mit zweien büchlin / Deren eins ist von Kezern / Das ander von der Oberkeit / so ich sol geschriben / vnd weis was Kezerisch mher hie geleret haben / von der Buß vnd vom freien willen / Der ich für Gott bis auff diese stunde nit weis / von wem dieselben büchlin komen / vnd etlich stücke darin selbs verdammē. Von der buß aber vnd vom freien willen nichts anders lere / denn ich von Luthero vnser aller Præceptor empfangen / vnd in klarer schrifft gegründet finde. Aber also vermeint man vns die sache zu machen / vnd wird dz jertz der danck vnd lohn vnser trewen arbeit / oder Gottes in vns / dadurch sie / die Adiaphoristen selb / nach obgedachter ihrer eigen bekantnis für dem gantzen Interim behütet sind.

Bestehet entlich hierauff nu soniel / das nit wir / sonder sie die Adiaphoristen selb / die trennung in vnsern Kirchen angefangen /

vnd sich von vns / ja von Gott / seinem Wort vnd Kirchen abgesondert / Vnd wir ihnen ausschuldigen / hochwichtigen / nötigen vrsachen widerprochen haben.

Das aber auch solche trennung vnd spaltung noch biß daher bleibt vnd nit auffhöret / ist vnser schuld vnd wille so wenig / als das wirs sollen angefangen haben / Sondern sie / die Adiaphoristen / sind hie abermals selb schuldig / so hoch vnd so tieff als vor / wie ich hiemit gründlich auff sie darthun wil.

Gleichwol so ist nit one / Weil wir mit vnserm feindseligen schreiben / wie es ihnen gewesen vnd noch ist / dannoch das jenige so wir vorhin gehezt / vñ darumb es zuthun gewesen / für vns vnd für viel andere erhalten / auch bey ihnen den Adiaphoristen selb fast wider zu rechte bracht haben / das sie nu auff die erste weise / wie bey leben Lutheri / wider beginnen von der lere zureden / das damit etwas viel ausgericht.

Dabei aber zubedencken / ob wir nu darauff mit ihnen wo'ten zufrieden sein / als wir doch Christlich nit können / wie hernach zuuernemen / das Gott vñ die Kirch darumb noch nit wird zufrieden sein / vnd dz ihret der Adiaphoristen eigen seligkeit damit noch nit ist gnug geschehē / Also dz sich warlich solche wunden / die sie in der Kirchen Christi
mit

mit ihren Adiaphoris gemacht / mit der Amnistia/
das ist / mit vergessen vnd stillschweigen des han-
dels nit werden heilen lassen / Wie jzt aus mensch-
licher Klugheit / on Gottes Wort / vnd on ware
fürcht Gottes von etlichen fürgeben / vnd in andern
dergleichen sachen gebraucht wird. Sondern auff
diz ichs kurtz sage / wie ja ein jeder in vnsern Kirch-
en selb wissen solt / oder so mans weis / auch dar-
nach richten vnd thun / so wil in summa ein rechte
ware Chrißliche buß darzu gehören. Welche was
sie eigentlich sey / ist in vnsern Kirchen auch vnuer-
borgen / vnd was in diesem fall der Adiaphoristen /
zu solcher buß wolt gehören / hat ein jeder versten-
diger Chriß gar leichtlich abzunehmen.

So lang denn solche ware Chrißliche Buß / der
begangnen ihrer schweren vnd öffentlichen sünde /
damit sie / wie Jeroboam / Israel haben sündigen
gemacht / von ihnen nit geschicht / wie sie denn
bis daher nit geschehen ist / So kan vnd wird Göt-
(welchs wol schrecklich zuhören / aber doch Gött-
lich wort vnd warheit ist) mit ihnen in ewigkeit
nit zufrieden sein / Vnd können wir als Christen /
fürnemlich aber als diener der Bußpredig gegen
ihnen / dieses fals mit nichte auch zufrieden sein /
des vns kein Chriß anders wird mügen aus Got-
tes wort bereden / Chrißlich auch nit mag an vns
begert werden.

Vnd ob ihnen demnach/wie wir wol können erwachten an vns nichts gelegen/ ja entlich auch daran nit viel wil gelegen sein/ob gleich die ganze Kirch/wiesie jetzo ist /hinsürt mit ihnen wolt zufrieden sein/ vnd der Buß halben vberhinstreichen / des sie aus Gottes wort keine macht hat/ die nachkomen auch anders dauon vtheilen werden/ ja albereit vieler gewissen andersvtheilen/ auch derjenigen/ denen auslieb der einigkeit vñ Personen/ die Anmistiā mit geliebet / So wird aber bede ihnen vnd vns allen/ sampt der ganzen Kirchen zum höchsten daran gelegen sein/ wenn Gott nit wird zufrieden sein. Als mit ihnen vnd denjenigen/ so sich durch sie verführen lassen / das sie nit ware buß gethan seiner beleidigten ehie vnd Kirchen/ durch viel gemelte schwere Jeroboams sünde / Mit vns aber/ die wir vns solcher sünden theilhaftig machen / mit auffnehmen ihrer Personen on ware buß / durch die Anmistiā.

Diese last wil ich für mein Person auff mich nit laden / dargegen öffentlich für Gott vñnd der Kirchen hiemit protestirt haben / auch andere warnet sich dafür nur wol zubewaren.

Wird denn nu Gott nit zu frieden sein / so wird

wird man entlich auch wol sinnen werden / was
er zu seiner zeit darzu thun wird / so fern die Buß
nit zuvor kumpt. Darff solche begangne vnd noch
vngedüßte sünde / des absals vnd abgötterei (so
weit von andern gemeinen sünden sonst zuscheidē)
vnser Kirchen noch etwa auffressen / wie sie denn
albereit gewislich durch Gottes gerechten zorn da-
rin thumoret / vnd in gleicher Historien Jerobo-
ams vnd Israels wol zusehen / wiebede die sünde
vnd straff derselben / auch ihre nachkommen durch-
gangen vnd mit verderbet hat.

Ja es darff nach wol betens vnd Gott fürch-
tens bei denen / die gleich buß gethan / deren denoch
Gott lob nit wenig / das Gott nit etwa noch her-
nach kome mit einer guten scharffen rute / da son-
derlich ihm darzu weiter ursach geben würde / Wie
er den dem Aaton vnd seines gülden Kalbs anbe-
eten dienet vnd thut / schon nach der versöhung /
In die vltionis visitabo hoc peccatum ipsorum / Ich
werde ihre sünde noch wol heimsuchen / wenn mei-
ne zeit kumpt heimsuchen Exodi 32. Das derhal-
ben Gott nit so bald wird zufrieden gestelt vnd
vergiß / als wir können vnd wollen vergessen mit
vnser Amnistia.

Bleibet demnach auch noch die schuld auff den
Adiaphoristen / vnd nit auff vns / nit zwar allein
das wir vnternander nit wider versönet vnd einig
werden / sondern das Gott ihnen vnd vielen an-
dern / ganzen Kirchen vnd Landen noch nit kan
versönet vnd zufriede sein / dieweil sie noch nit
ware Christliche bus thun von wegen solcher
schweren sünden / Vnd mögen sie jetzt drüber zür-
nen oder lachen / so wird sichs zu seiner zeit aus-
weisen.

Das sie aber solche bus bis daher noch nit than/
beweiset sich klar aus den fruchten / danon der
Teuffer Iohannes redet / Man solt rechtschaffene
fruchte & Busse thun. Warnet dabel für der heuch-
lei vñ geistlichen hoffart / Dencket nur nit / spricht
er / das jr bei euch sagen wollet / Wir haben
Abraham zum Vatter / oder wie er jzt hie sagen
würde / Wir sind grosse hochgelerte zc. Gott
mag dem Abraham aus diesen steinen kinder er-
wecken / Also euch grosse Adiaphoristen lassen blei-
ben. vnd sein werck fort in der Kirchen durch einen
fremden verächtlichen Wenden / wie jr ihn achtet
vnd heisset / ausrichten / Es ist schon die Art den
bäumen an die wurzel gelegt zc. Aber zur sache.
Setten die Adiaphoristen jemals ware Christliche
Bus

Bus gethan / welche nach gemeiner bekantter leere
vnsrer Kirchen / aus heiliger Göttlicher schrifft/
stehet in warer erkantnis der sünden vnd herzlich-
er reu oder furcht Gottes / in warem glauben vnd
trost der vergebung allein durch Chrustum / vnd
in warer besserung vnd enderung / des was man
bessern vnd endern kan / So würden noch könnten
sie die begangne ihre hendel nimer entschuldigen/
beschönen / viel weniger loben / weder öffentlich
noch heimlich / wie sie noch jmerdar thun / wo
derselben bei ihnen nur gedacht würd.

Würden vnd könnten die straff / so ihnen durch
Gottes wort drüber begegnet / nit ein Tuffels-
werck / vnd vns / die wir die straff aus Gottes
wort vnd beuelch gethan / nit als werckzeuge des
Tuffels darin lesten / vns darumb so bitter seind
sein / verschmehen / verhessig machen / practicirn vñ
incitirn zu vnserm verderben / wie sichs etwa im
werck ausweisen möchte / do Gott verhenget.

Würden die Bus auch an denen nit hindern
oder auff halten / die durch ihs reden / schreiben/
grosses ansehen versüret / deshalben noch in ders-
elben sünden stecken oder mher gesterck werden/
vnd noch jmer andere weiter darenin geflochten.

Würden die gefährliche falsche Interims Propositi-
tion,

tion / das gute werck zur seligkeit nötig / nach dem
sie bei ihnen vnd von den ihren öffentlich verteidigt
worden / öffentlich wider verdammen vnd ver-
werffen.

Würden dem heillosen trewmer nimer mehr
dazu mögen stilschweigen / viel weniger an ihm
gefallen lassen / da er den auserwelden Gottes
werckzeug zu restauration der Lere vnd Kirchen
dieser zeit / Lutherum in seinem trawm einfüret/
wie er sich durch sein eigen vrtail im grund selb ver-
damme / eben in dem da er ihn arglistiglich mit lo-
bet / Welchs nit so fast vmb die Person des Lu-
thers / so nun hin ist vnd ihren richter hat / als
vmb die lere zuthun ist / so noch in vnsern Kirchen
geleret / vnd zugleich mit verdampt / oder ja fast
verdecktig gemacht wird.

Wie er denn auch / der lose trewmer / an dem
selben ort vnd auff dieselbe weise / ihm / dem Luthero /
seiner besten bücher eins / de seruo arbitrio con-
tra Erasmus / darin der grund ist zu rechtschaffner
lere vnser rechtfertigung / eben in dem auch mit
auffhebt / da ers nach seiner arglistigkeit etwas lo-
bet / als hab Lutherus den hochgelerten weisen
Erasmus nur damit äffen wollen / gleichsam
nit sein ernstlich meinung gewesen / das der freie
wille

wille des menschen so gar nichts sei zur seligkeit.
Welches warauff es vorher gangen / findet sich
zum teiligt schon im werck / wird zu seiner zeit
auch noch wol bas ausbrechen / was es gelte dem
Artickel vnser rechtfertigung.

Viel weniger würden sie leiden vnd zugeben /
daz eben wiß die heuptmeinung desselben buchs Lu-
theri de seruo arbitrio / zu Leipzig in öffentlicher
Disputation durch Pfeffinger (der seinen namen
darleihet / aber der Author als Saul vnter dem
Propheten sich wol zuerkennen gibt) nouum & se-
miliberum arbitrium / das ist / ein newer vnd halb-
er freier wille zur seligkeit / austrücklich vnd auff
ihrer der fürnemsten Adiaphoristen einen / auch noch
aus dem Interim her / neulich verteidigt vnd in
druck geben worden ist / Als vermöge der freie wil-
le nichts zur seligkeit / dieselbe zu verdienen / aber zu
der verdienten vnd erworbenen seligkeit in Christo /
durch ware Buß zukommen / vermöge der freie
wille viel / vnd so der heilig geist nur mitwircket /
seies an des menschen freien willen nur alles ge-
gen / das er ware buß thun vnd also selig werden
möge / wenn vnd wie offter wil / oder Gott mü-
ste ihnen ein vngerechter Got sein zc. Dawider
ich vnd andere / vnser ware gründliche mei-
C ji nung

nung / aus Gottes wort vnd klarem beweis La-
theri hinwider offentlich werden müssen darge-
ben / so fern es mit gebürlicher weise wird fürko-
men / das wir lieber wolten vnd gern sehen. Es
werde der ganz vnd die vneinigkeit nu dadurch
größer oder kleiner / so können vnd sollen wir zu
solcher verfälschung der aller höchsten vnd nötig-
sten Artikel ja nit schweigen.

Aus welchem bisher nu ferner klar vnd un-
dersprechlich verstanden wird / das die Adiapho-
risten noch keine ware Christliche buß gethan / wie
aus ihren fruchten zuuernemen / Vnd das demnach
nit wir / sondern sie die einigkeit vnserer Kirchen
wie anfänglich zertrent / also auch bis auff diese
stunde noch hindern vnd auffhalten. Des wir vns
hiemit für Gott wol entschuldigt wissen vnd zwei-
nelt gar nit / alle Christliche hertzen / so die sache
nach Gottes wort recht vrtelen / vnd nur das an-
sehen der Personen aus dem wege thun / werden
vns gleichfals wol entschuldigt nemen / Darnu
zeugnis geben müssen / das wir der Kirchen mit
vnserm thun vnd widersprechen hierin nit böse
sondern gute gethan haben.

So nu dem also / wie Gott der allerhöchste vnd
gerechte

gerecht Richter/ zu seiner zeit vnser vnschuld für-
nemlich selb wol zeigen vnd darthun wird/ so müs-
sen wirs gleich den Adiaphoristen in ihren gewissen
vnd für Gott zutreffen geben (welchs wir ihnen/
Gott weis/ doch von hertzen anders gönnen) das
sie so lange zeit ihres schweren fals her/ nu bis in
das VIII. jar vnbusfertigt blieben / vnd forder vil-
leicht bleiben wollen / ihre sünde gar nit erkennen/
ober so sie es bei ihnen selbs erkennen/ dennoch nit
frei bekennen/ vñ wider ihr eigen gewissen nit recht
darnach thun wollen / Welchs Paulus heist die
wahrheit in vngerechtigkeit auffhalten / vnd ich
nur dabei der straffe besorge / so der Apostel dar-
auff desselben orts beschreibet/ Vani facti sunt in co-
gitationibus suis 22.

Damit aber darumb die gangz Kirche nit in not
vnd gefhar gegen Gott bleibe / vnd da sie sonst in
viel ander wege zerrissen/ mit falscher lere vnd vn-
einigkeit von aussen vnd innen schwerlich wird an-
gesochten/ doch wider zu eusserlicher einigkeit vn-
ter vns gebracht werde / dahin wir nu mher sehen
müssen / vnd begern water einigkeit für vnsern teil
von gangzem hertzen / So sind noch darzu seiner
massen vbrig zween wege / die ich hiemit zum an-
bern teil vnd beschlus dieser schrifft kurz anzeigen
wil/ deren sich die Adiaphoristen mit nichte können
wegeru

wegern / haben sie lust zum frieden / des sie sich mit
worten soniel thümen / Chriſtliche Oberkeiten es
auch dahin zubringen amptwegen ſchuldig ſind.

Der erſte iſt der rechte ſtracke vnd ordentlichſte
weg / auff den fall / do ſie ſich / die Adiaphori-
ſten / je noch nit erkennen können / oder dafür wollen
gehalten ſein / als die ſo ſchrecklich geirret / vnd in
irhum geführt haben / das man dartzu anſtelle vnd
fürneme ein ordentliche verhör / durch Verſtendige /
Gottſüchtige / Vnparteische Leut / wie wir vns
dartzu in öffentlicher vnſer Prouocation zuuor auch
ſchon erboten / Vnd ſein / ſie / die Adiaphoriſten / alda
kläger / oder aber wir wollen klagen / wie es ihnen
gefelt. Darauff denn nach fürgebrachter erwieſe-
ner klage vnd antwort / aus Gottes wort geurteilt /
dem ſchuldigen teil ein ſtillſchweigen vñ öffentlich
er freier widerruff auffgelegt werde / vñ was man
noch weiter dartzu thun wolte. Allein das gleichheit
gehalten / vnd gegen einem gehandelt werde als ge-
gen dem andern / ſol es anders ein gerechts gericht
ſein oder heißen.

Der ander vnd negſte / auch ordentlichſte weg
nach dem ißigen / ſtehet auff dem / Do ſie / die
Adiapho-

Adiaphoristen/solche ihre sünde nochmals vō ihnen
selbs erckneten/on vorgehende solche beschwer-
liche gerichtshandlung(wie sie denn anfänglich für
vns selb vnd etlichen andern sie wol erkent vñ in der
geheim bekent haben) das sie die darauff auch öf-
fentlich bekenneten. Vnd do sie solchs aus freiem
geneigten willen nit thun wölten (das doch ihnen
selb zu ihrer seel seligkeit vñ zu besserung der Kirch-
en am besten were) das sie dennoch ordentlicher
weise / vñ Gottes vñ der Kirchen willen/ dahin
gehalten vnd gebracht würden / die ganz hand-
lung des Leipziger Interims zu vergleichung
Christi vnd Belials fürgenommen/ vnd was zu ver-
teidigung derselben ausgangen/durch einen öffent-
lichen gemeinen druck zum wenigsten zu cassirn/
Die versürten vnd verwirten gewissen dadurch
wider zurecht zubringen / vnd die buß mit ihrem
stillschweigen nit bei ihnen auffzuhaltten / auch
wege vnd raum / oder viel inder versach zulassen
oder zugeben/damit die ganz ware Religion durch
dergleichen handlung / auff ihre gründe / auho-
riret vnd grosses ansehen / bey den nachkommen gar
möchte verfelscht oder verdrückt werden. Dane-
ben das man sich erböte (vnd auch darnach there)
bei der Augspurgischen Confession schlecht vnd
recht zubleiben / wie die bey leben Lutheri
von ihm mündlich vñ schriftlich erkläret /

vnd von vns eintrechtig in öffentlicher lere gehalten worden ist/ Was derselben zuwider / demselben auch eintrechtig miteinander zuwiderstehen.

Einer solchen öffentlichen bekentnis vnd erklerung ist zum aller wenigsten vonnöten / nit allein zu warer iherer buß vnd versöhnung gegen Gott / sondern auch zu warer versöhnung vnd einigkeit für der Kirchen. Welche do sie also geschicht / bin ich für meinen teil erbötig nit allein zu derselben gemeinen öffentlichen versöhnung vnd einigkeit / sondern auch zu aller gebürlichen ehre vnd freundschaft gegen ihren Personen / do sie es leiden mögen. Anders wird mich / ab Gott will / niemand vermögen / er vberzeuge michs denn anders aus Göttlichem wort / das ich begangner iherer sünden haben mit ihnen enig sei / viel weniger das ich mir ihre handlungen darin gefallen lasse / oder auch hin für nit solte straffen / es gehe mir darüber wie der liebe Gott will.

Es ist doch sonst nu an dem / das die gaben Gottes / erkentnis vnd einer zu erklerung vnd erhaltung reiner lere / welche Gott zu vnser zeit gang reichlich in Deutschland vber vns hat ausgeschüttet / fast dahin schwinden / vnd nu mher nit besserung oder mherung derselben / sondern nur minderung zuwarten. Vnd müssen nur gewöhnlich den größten

größten schaden in der Kirchen die thun / so von
vns selb ausgehen / vnd zu denen man
sich am wenigsten versihet. Darumb
geschehe was Gott zu straff der
vndanckbarn vnd vnbeser-
tigen welt verordnet hat /
vnd sei gleichwol
ein jeder Christ
darauff ver-
war-
net.



GEBET

NEXX Allmechtiger / barmherzi-
ger / gütiger Gott vn Datter / der du nach
deinem Göttlichen rat vnd aller gnedig-
sten willen / in diesen letzten gefehrlichsten zeiten /
vns aus den dicken finsternissen vnd gewulichsten
geweln des Bapstums errettet hast / durch erleuch-
D
tung

tung deines heiligen Worte / wie du das durch be-
nen auserwelden werckzeug Lutherum wider ange-
zündet / wunderbarlich geführt / vnd bis daher er-
halten / mich auch gnediglich gebracht hast zu des-
selben worts erkenntnis / vnd mit gesetzt weiter an-
dere zuleren / Dadurch ich schuldig mit allen Chri-
sten / vnd nach dem ampt / mit allen Dienern / dich
zubekennen / wider alle feindschafft deines Wider-
wertigen / mich selb vnd andere für aller gemein-
schafft seiner greuel / durchs wort zubewahren /
vnd dir allein zu reinem dienst zubehalten / Welchs
ich gethan / nach der maß vnd gabe / wie du es ge-
ben vnd gewircket hast. Vnd sage danck für diesel-
be deine gabe / das du sie in vns nit hast lassen ver-
gehens sein.

Das nu solch dein Wort vnd dein Werck in vns /
wie zuuor in deinem lieben Son Christo selbs / als
ein wort vnd werck des Teufels on auffhören wil
verlestert / vnd entlich mit gewalt vnd bösen Pra-
ctiken verdrückt werden / sonderlich von des glau-
bens verwanten vnd obersten / wie es che gewesen
vnd sein sol / Solchs klagen wir dir.

Vnd bitte ich noch / du getrewer lieber himlischer
Vatter / der du wist / wie ich dir mit eifeltigem
herzen vnd gutem gewissen darin gedienet hab /
Du wöllest mich / wie nit vnwissend lassen irren /
das ich thum möcht / das mit dein gewisses Wort
vnd

vnd Warheit ist / also mich in derselben deiner
Göttlichen warheit / so ich weis / durchs wort fer-
ner leiten / mit weisheit vnd krafft deines heiligen
Geists begnaden vñ stercken / dieselbig deine Gött-
liche warheit / wie sich gebüret / frei on schew / vol-
lend bis an mein ende zubekennen / in nichte dauon
abzuweichen / darüber auch zuleiden / was dein
Göttlicher wille ist. Entlich auch ein mal kund
thun / zu ehren deines namens / dz dein wort in vns
gewesen / vnd wie du geredt hast / zuschanden müs-
sen werden alle die sich wider dein wort setzen / vnd
auff menschen verlassen / Vmb Ihesu

Christi deines lieben Sons / mei-
nes einigen trosts / helffers
vnd erlösers wil-
len.

A M E N.



Gedruckt zu Regenspurg durch
Hansen Khol.

